

# Pemuda kaji dasar kongsi kuasa zaman Tun Razak

Um-19/5/2007

**KUALA LUMPUR** 18 Mei - Dasar-dasar yang diperkenalkan Allahyarham Tun Abdul Razak Hussein ketika pentadbirannya seperti perkongsian kuasa antara kaum akan menjadi tema seminar anjuran Pergerakan Pemuda UMNO Jun ini sempena sambutan ke-50 kemerdekaan negara.

Naib Ketuanya, Khairy Jamaluddin berkata, seminar Legasi Tun Abdul Razak Perintis Kepimpinan Global itu akan menghimpunkan kalangan politik, kakitangan kerajaan, ahli akademik dan pelajar universiti untuk cuba membongkar kembali matlamat dasar-dasar Perdana Menteri kedua itu yang belum tercapai sepenuhnya.

"Kita akan berbincang dan cuba mencungkil kembali dasar terbaik yang pernah diperkenalkan Tun Razak untuk diamalkan dalam pentadbiran sekarang.

"Dasar-dasar seperti perkongsian kuasa antara kaum adalah salah satu ilham be-

liau yang masih kuat kita amalkan pada hari ini," katanya pada sidang media di Ibu pejabat Pemuda UMNO di sini hari ini.

Seminar dua hari pada 15 dan 16 Jun itu dijadual dirasmikan oleh Timbalan Perdana Menteri, Datuk Seri Najib Tun Razak di Pusat Konvensyen Sime Darby, Bukit Kiara.

Menurut Khairy, beliau berharap hasil perbincangan seminar itu dapat membantu generasi muda memahami dan menghargai jasa Tun Razak ketika itu.

"Kita juga tidak melupakan jasa pemimpin terdahulu seperti Tunku Abdul Rahman Putra (Perdana Menteri pertama) dan Datuk Onn Jaafar (pengasas UMNO), cuma kita memberi tumpuan yang lebih kepada Tun Razak pada tahun ini," katanya.

Khairy berkata, seminar itu akan turut cuba mencari formula terbaik dalam mengukuhkan perpaduan kaum seterusnya memastikan keharmonian hubungan antara kaum dalam negara akan terpelihara.

Orang ramai yang ingin mengikuti seminar itu boleh menghubungi Akademi Pemuda UMNO di talian 03-4044 0159/ 40 43 8658 dan boleh mendaftar melalui laman web [www.ptr.com.my](http://www.ptr.com.my).

**KHAIRY** Jamaluddin pada sidang media mengenai Legasi Tun Razak di Kuala Lumpur, semalam.

- Gambar ABD. RAHMAN SALEH

- Bernama

